

大方等陀羅尼經

卷二

百八十七  
可二

48631



元祿九年丙子二月日重脩

皇圖翠固 帝階綴呂

佛日增輝 懋輪崇轉

山城州天安寺法金剛院置





大方等陀羅尼經卷第二

北涼沙門釋

法眾譯



可

初分餘

善男子汝若未了此事當更為汝略說往昔  
因緣本事善男子爾時上首重告恒伽言過  
去有佛号栴檀華至真等正覺國名真香彼

佛於中成等正覺國王名寶栴檀其王有弟  
名曰林果尔時大王有九百九十九子



王子治世暴惡不順律行其王大吉常以諸  
善順化眾生成得究竟樂尔時大王及弟林果  
即坐思惟曾從九十二億恒河沙諸佛受此  
妙戒今我復應持此妙戒攝我弟子使得正



見作是念時十方無量億千那由他恒河沙  
等諸佛異口同音而讚大王善哉善哉大王  
及弟林果乃能受持如是妙戒欲攝諸子尔  
時大王及弟林果聞諸佛聲即從座起願視  
四方既見諸佛即前禮足却住一面即召諸  
子尔時諸子往到父所見諸佛已各禮佛足  
却住一面即白父言欲何所勅尔時大王與  
弟林果告諸子言汝等知不我有妙戒曾從  
無量億千諸佛受是妙戒汝等今能受此戒  
不尔時諸子歡喜踊躍頂禮父足叉手合掌  
瞻仰父目而報父言唯然慈父我等能受如  
是妙戒尔時大王及弟林果現其神力令諸



子等得見十方無量億千那由他恒河沙等  
諸佛住在虛空。尔時諸子各禮佛足求受妙  
戒。尔時諸佛默然許之。是時諸子如是第二  
第三請已。尔時諸子各自燒身經八万四千  
劫供養諸佛。已復從地起瞻仰諸佛求受妙  
戒。尔時諸佛即授諸子如上妙戒。善男子。尔  
時上首告恒伽言。欲知尔時諸王子最上首  
者。今則我是。欲知諸王子中第二者。豈異人  
乎。今則汝是也。善男子。尔時上首說此法時。  
虛空中有九十二億諸天得住無生法。忍復  
次善男子。尔時上首廣為恒伽演說如是大  
利益法。尔時恒伽歡喜踊躍受是妙戒。善男

子如是等人是汝往昔善知識也是故我今  
當爲汝說善男子尔時上首者今則華聚菩  
薩是欲知尔時恒伽者豈異人乎則汝身是  
尔時拏檀王者今東方寶王佛是欲知尔時  
林果者則我身是欲知尔時諸子者今賢劫  
千佛是尔時九十二億諸天者豈異人乎今  
此九十二億諸魔王是善男子如是諸魔王  
欲令汝憶本所修行善業力故又欲令我說  
徃因緣故故來蔽汝又欲令我說大方等陀  
羅尼經救攝當來苦惱衆生故以是因緣故  
來燒汝尔時五百大弟子菩薩摩訶薩衆優  
婆塞優婆夷居士居士天人魔王婆藪大



士及以夜叉如是大衆歡喜踊躍頂戴奉行  
尔時佛告阿難汝聞諸佛實法以不唯然世  
尊今日乃聞如是章句甚深法藏甚爲希有  
能離一切地獄餓鬼諸天人等一切衆生無  
不解脫能滅一切諸罪業報尔時佛告阿難  
善男子快說是語如汝所言言真實不虛此經  
若我在世若去世後此經在閻浮提猶如日  
光照明世間衆生遭恩得見四方又如諸山  
須弥最高若居其頂即皆得見四方之事此  
陀羅尼經亦復如是諸法中高見諸法相又  
如大海而無邊底此陀羅尼經亦復如是而  
無邊底所得功德亦無邊底善男子吾以如

是無邊法藏付囑於汝汝可護念修行受持  
尔時阿難白佛言世尊若如是者我不堪任  
修行受持如是經典何以故此法甚深無邊  
際故此經最高如須弥故非是聲聞之所能  
持何以故難得邊際故非我知故以是因緣  
我不堪任受持修行如是經典尔時佛告阿  
難於汝意云何假使有天名矜恒伽居非想  
非非想上身長一由旬若二由旬至於九十  
由旬若八百由旬如是等天而無一善唯有  
諸惡圍遶此身若以頭髮牙齒瓜皮毛孔一  
一出火能燒一切善男子此天假使下閻浮  
提若到山谷叢林若到泉源河池之處城邑



聚落是天惡力身中出火能燒一切三千大千世界善男子假使當有如是等事寧可畏不阿難白言甚可畏也世尊假使有如是苦當云何滅耶善男子汝今若畏如是苦者汝當修行受持讀誦大方等陀羅尼經假使當有如是諸火變成種種七寶蓮華善男子以是因緣當知此經有大威神功德之力能滅如是無量惡咎復次善男子且置此事若有一象一身十頭頭有二牙身有四足如是等象世間暴惡日日食時而不擇處於其日日食中有四生衆生如是惡象悉皆食瞰其中衆生若有覺者跳騰突走而永得脫若當不

覺此惡象者必爲所食善男子如是等象寧  
可畏不阿難白佛可畏世尊若有衆生能壞  
如是惡象心不佛言有阿難言何人是也善  
男子若有修行此陀羅尼者即其人也若有  
受持讀誦即是其人復次善男子假使有蛇  
受性甚惡此蛇所至到處若值衆人一切有

命之屬若聞其臭亦能害命若見其形亦能  
害命若到泉源叢林浴池諸產乳處能悉枯  
涸若衆生類若聞此名口啞不言善男子如  
是等事寧可畏不阿難白言可畏世尊頗有  
四產衆生能滅如是等若不佛告阿難善男  
子有阿難白言何人是也佛告阿難若有善



男子善女人修行受持讀誦此陀羅尼者即  
其人也復次善男子若復有龍居在世間此  
龍受性極大暴惡若見人類若畜生類及以  
樹木五穀叢林濕生卵生等如上惡龍若見  
如是一一諸事橫生瞋恚又能吐火又能吐  
水頗有人能滅是上諸惡不善男子若國邑聚  
落但有一人已曾受持讀誦修行陀羅尼典  
如上諸事悉皆消滅無量衆生遭此人恩而  
得安隱善男子以是因緣當知此經有無量  
威神功德之力以是因緣我今語汝受持此  
經我去世後此經若在閻浮提內即是衆生  
大珍寶也若能修行受持讀誦當知是人全

用寶者若復有人但能讀誦當知是人得中  
分寶若以種種塗香末香華繒幡蓋而供養  
者當知是人得下分寶善男子吾今為汝說  
下分寶因緣之相善男子若有一人神通無  
礙如文殊師利亦喻於我辯才無礙與我二  
人於一劫中常以辯才能為無量無邊衆生說  
法令住一生補處菩薩摩訶薩復盡神通以  
種種衣服卧具飲食湯藥供養是諸菩薩是  
人福報寧為多不阿難白言甚多世尊善男  
子若復有人以塗香末香華繒幡蓋以用供  
養此經典中一四句偈又若供養讀誦之者  
此人功德復過於我所作何況盡形修



行受持讀誦者耶此人功德不可稱計若筭  
師若筭師弟子筭數盡計百千万分不能知  
一善男子且置此事假使有諸菩薩一生當  
得作佛若百千万億恒河沙是諸菩薩盡神  
通力又盡辯才若一劫乃至百千万劫同入  
禪定如是無量菩薩欲思惟修行受持讀誦  
此大方等陀羅尼者百千万分不及其一善  
男子當知是經有大威神功德之力又是國  
中之大寶藏一切衆生之所歸向以是因緣  
吾今語汝受持此經在閻浮提廣宣流布爲  
衆生說令諸衆生得究竟樂尔時阿難及五  
百大弟子無量大衆即從座起偏袒右肩右

膝著地頂禮佛足歡喜奉行。

大方等陀羅尼經授記分第二

尔時雷音即從座起偏袒右肩合掌向佛而作是言善哉世尊巧說行業因緣往昔所作今已說竟以此大方等陀羅尼經付囑阿難流布於後無量衆生當於此法獲大善利快哉世尊大慈悲王佛告雷音善男子如汝所言吾所應說今已說竟諸未說者吾今當說真汝所宜善男子汝於賢劫當得作佛名雷音寶王如來應供正遍知明行足善逝世間解無上士調御丈夫天人師佛世尊國名普威清淨無比純諸菩薩而集其中是諸菩薩



辯才無礙神通無量了達方便一一菩薩有大光明能照八十万億恒河沙刹土覩斯光者即得揔持神通無量如諸菩薩而無異也彼國所有莊嚴之事世界無比汝於此界而得作佛壽六百二十萬歲正法像法亦復如是尔時聲聞五百大弟子眾即從座起正衣

服頂禮佛足却住一面同聲讚言  
世尊智慧如虛空

悉知衆生去來相

十方一切皆見聞

我當稽首衆寶王

尔時佛告五百大弟子眾汝等亦當各各作佛俱同一号号寶月王如來無所著至七具等正覺尔時佛授五百大弟子記時十方三千

大千世界所有枯竭泉源池水諸樹木等悉  
皆還生。尔時三千大千世界六變震動。諸梵  
天王及諸帝釋見此相已，各共思量有何因  
緣。現此瑞應為大德。天生為授諸菩薩摩訶  
薩。阿耨多羅三藐三菩提。記耶。尔時所有一  
切諸天，即往娑婆世界，往見釋迦牟尼佛。已  
授諸聲聞大弟子，記即時頭面禮世尊足禮  
已，却住一面同聲讚言。

世尊智慧甚深妙

能潤一切諸敗種

猶如蓮華真妙色

不著世間如虛空

尔時諸天說偈讚已，佛告諸天子：汝等不久  
亦當得阿耨多羅三藐三菩提，成一切智。是



時佛告東方天子汝今諦聽當爲汝說成佛  
因緣東方有世界名曰離垢汝於此界當得  
阿耨多羅三藐三菩提成一切智佛告南方  
天子有世界名曰染色汝於此界當得阿耨  
多羅三藐三菩提成一切智佛告西方天子  
有世界名曰妙色汝於此界當得阿耨多羅  
三藐三菩提成一切智佛告北方天子有世  
界名曰衆難汝於此界當得阿耨多羅三藐  
三菩提成一切智天子白佛世界何故名曰  
衆難佛言彼界自來未有佛故故名衆難佛  
告下方天子有世界名曰衆聲汝於此界當  
得阿耨多羅三藐三菩提成一切智佛告上

方天子有世界名曰衆妙汝於此界當得阿  
耨多羅三藐三菩提成一切智佛告十方世  
界一切諸天子汝等亦當各各作佛尔時世尊  
授諸天子記時放大光明普照十方界大小  
鐵圍山尔時大小鐵圍山間所有餓鬼阿脩  
羅等無量億千見此光明一一光頭各有化  
佛時諸化佛呼諸餓鬼汝等苦人可往閻浮  
提可服良藥是時餓鬼遙見釋迦牟尼佛坐  
師子座授諸天人阿耨多羅三藐三菩提記  
尔時衆中有一阿脩羅即上高山呼諸餓鬼  
汝等苦人可往閻浮提得聞諸佛甘露法味  
尔時諸鬼即從此人往閻浮提見釋迦牟尼



佛與無量大衆前後圍遶而爲說法。爾時阿脩羅見諸大衆同曜金色，悉有三十二相八十種好。是時阿脩羅而自念言：何者是佛？爾時世尊知其心念，踊在虛空，高十多羅樹坐。寶蓮華時，阿脩羅以偈讚佛。

世尊面目如月王

能破一切諸黑闇

今復拔濟於我等

我等歸命天中尊

爾時世尊告諸餓鬼、汝等在此經於幾載時，阿脩羅而白佛言：我等遙聞九十二億諸佛已過今日，乃得值天中王。爾時世尊爲諸餓鬼說十二因緣，爲阿脩羅說六波羅蜜。說此法時，阿脩羅等發阿耨多羅三藐三菩提心。

時諸餓鬼即時脫身求索出家。爾時世尊告善男子：能於我法求索出家，時諸善男子即成沙門戒行具足。爾時世尊為諸比丘說摩訶袒持陀羅尼章句。時諸比丘得阿羅漢三明六通，具八解脫。爾時舍利弗白佛言：世尊，此經如是神力無量，能使一切天人阿脩羅地獄餓鬼集至道場。經力如是能救一切受持經人功德。云何？爾時佛告舍利弗：吾向語汝何用問？為爾時舍利弗白佛言：世尊，受持此經者當以何供而供養之？佛告舍利弗：若有一人持頭目身體妻子婦兒象馬七珍以供養我，不如有人能一禮拜此經卷者。若復



有人持四天下以積珍寶至于梵天以供於  
我不如有人與彼受持經者一食充軀若復  
有人於三千大千世界積於珍寶至到住世  
界以供於我不如有人持此章句一日一夜  
何況盡形受持如是章句功德無量若復有  
人積於珍寶遍至十方微塵等世界上至堅  
立世界盡供於我不如有人持一四句偈轉  
教他人功德無量無邊佛告舍利弗一切聲  
聞辟支佛等上至十住菩薩等數譬喻不能  
知彼受持經者少分功德

尔時佛告阿難汝聞如是功德聚不唯然世  
尊我向已聞且置此事吾今當更語汝阿難

汝今諦聽當爲汝說此經功德於汝意云何  
一切十方所有蠅蚋之類若有一人解種種  
語是諸衆生而以化之上至禽獸諸衆生類  
令得人身復能令其信於三世是人功德寧  
爲多不阿難白佛甚多世尊阿難若復有人  
書持此經一四句偈此人功德復過於上百  
千万分乃至筭數譬喻不能到邊阿難且置  
此事若復有人於此經中聞於一偈不驚不  
怖不生誹謗此人功德復過於上二分所作  
亦以筭數譬喻所不到邊阿難且置此事若  
復有人聞經歡喜若自書寫若使人寫若見  
他寫若聞他寫心生歡喜此人功德復過於



上三分所作阿難且置此事若復有人辯才  
無礙如文殊師利法王之子化於一佛世界  
衆生令其出家悉皆獲得四沙門果復更有  
人如文殊師利復化百六十世界衆生或出  
家者或得阿羅漢者或得辟支佛者或發阿  
耨多羅三藐三菩提心者於汝意云何是二  
人功德寧爲多不阿難白佛甚多世尊不可  
稱計不可度量阿難若有一人得聞此經歡  
喜踊躍至於道場修行七日此人功德復過  
於上一切所作一切波旬所不能伏阿難白  
佛言我與大衆歡喜奉行

尔時文殊師利法王之子菩薩摩訶薩在大

衆中作是念言釋迦如來與無量大衆前後  
圍遶說此大方等陀羅尼經我今不知是義  
所趣今當請問所以者何天中尊王唯有如  
來乃能爲我解說是義作是念已即從座起  
偏袒右肩右膝著地恭敬合掌目不暫捨白  
佛言世尊如前所說先於王舍大城授諸聲  
聞記今復於舍衛國祇陀林中復授聲聞記  
昔於波羅奈授諸聲聞大弟子記世尊我今  
少有疑惑欲請問如來唯佛聽許今時舍利  
弗問文殊師利法王子言世尊弘慈無量授  
我等聲聞大弟子記已不久當得阿耨多羅  
三藐三菩提成一切智各於世界如今世尊



攝諸衆生常在道場世尊不虛所言真實故  
能第二第三授我等聲聞大弟子記我等必  
當如釋迦牟尼如來決定不虛無有疑也文  
殊師利於汝意云何我等當得阿耨多羅三  
藐三菩提不文殊師利語舍利弗於汝意云  
何猶如枯樹更生枝不猶如山水還本處不  
猶如石片還可合不如焦穀種更生牙不如  
沸酥中可種子不如是諸事爲可得不舍利  
弗言不也文殊師利如上諸事實不可得文  
殊師利言若不可得者汝云何問我當得阿  
耨多羅三藐三菩提記心生歡喜是授記法  
無有形相無有言語無有去來無有喜悅無

有得相乃無言語無有妄想分別諸法於授  
記法應作如是相可得如性夫授記法如虛  
空無色亦如虛空無形如浮雲無實如風無  
體如空以聞聲不見形如水聚沫無有實處  
如野馬炎軋闍婆城當知如是諸法無有實  
處夫菩薩摩訶薩授記法應如是觀諸法相  
若能如是觀者乃名授阿耨多羅三藐三菩  
提記舍利弗問文殊師利言若一切法性空  
者如來以何法授我等阿耨多羅三藐三菩  
提記耶文殊師利荅舍利弗言如來以如如  
性授汝等記舍利弗言如文殊師利所說中  
無有如性汝今語我如來以如如性授汝等



記文殊師利荅舍利弗言如來授記不即是  
如不離是如舍利弗言如上所說無有形相  
而今此法有形相無文殊師利言不有不無  
不離一不離二不離色不即是色舍利弗言且  
置此事我近問汝文殊師利如來三十二相  
有形相無文殊師利言不即是形相復不離  
形相是三十二相舍利弗言如來授我等三  
菩提記寧虛妄乎文殊師利言不即是虛妄  
不離是虛妄舍利弗言當云何求文殊師利  
言如如性中求舍利弗言此如如性當於何  
求文殊師利言於如來真諦中求舍利弗言  
如來真諦當於何求文殊師利言於如如性

中求舍利弗言即是如乎不即如乎文殊師  
利言不即不離即是如性舍利弗言即是如  
乎不即如乎文殊師利言即亦是如不即亦  
如不即不離是名如性尔時舍利弗不識是  
何言不知以何答嘿然而去詣本坐處尔時  
佛告文殊師利法王子言善哉善哉佛子使  
說是語如受記法夫授託者應如是觀是法  
性名爲授記時舍利弗在於佛前而自嘆說  
捨於聲聞辟支佛心還至本業佛告舍利弗  
善哉善哉善男子乃能除捨聲聞辟支佛心  
還至本業而不取著諸法性相不久當得阿  
耨多羅三藐三菩提說此法時無量億千那



由他大衆皆發阿耨多羅三藐三菩提心  
爾時五百大弟子即從座起頭面禮足而白  
佛言世尊如佛所說行此法時當有波旬來  
壞是人善根因緣云何而知爾時佛告五百  
大弟子衆此魔來時凡有四十萬億來至人  
所發大惡聲梁棟搖動放大惡風或時放火  
或時放水欲殺其人或時夢中立其人前按  
拔其舌或時吐火噴人面上或時擎山欲壓  
其人此人應答汝來甚善作是語時應默心  
中誦摩訶袒持陀羅尼章句復應稱言南無釋  
迦牟尼佛南無文殊師利法王子虛空藏法  
王子觀世音法王子毗沙門法王子虛空法

王子破闇法王子普聞法王子妙形法王子  
大空法王子真如法王子如是菩薩摩訶薩  
應念其名如是諸法王必往其所擁護是人令  
此人等身得安樂無諸苦惱是諸比丘若值  
諸難應如是念諸王名字尔時阿難白佛言  
世尊行者如是為諸波旬如是恐怖諸王大  
慈能救彼人當以何供供養諸王尔時佛告  
阿難波旬去已應作種種香華塗香末香供  
養諸王作種種香泥塗其室內彩畫畫之異口  
同音讚諸法王尔時觀世音即入其室若作  
道人若作沙弥式义沙弥尼若作優婆塞若  
作乞士若作餓狗來入其室若作僑客來入



其室至於此宿若作國王王子來入其室若  
作常見之人來入其室念時阿難白佛言世  
尊行此法時得衆多人不佛告阿難十人已  
還阿難白佛復得語人佛告阿難但念摩訶  
袒持陀羅尼句何用語爲佛告阿難若有善  
男子善女人修行此經者若眼見無量壽佛  
釋迦牟尼佛維衛佛式佛隨葉佛拘樓秦佛  
拘那含牟尼佛迦葉佛過去雲雷音王佛秘  
法藏佛是諸佛前至心懺悔當滅九十二億  
生死之罪此人於三途永無有分生死漏盡  
即時得見現前諸佛復更懺悔以種種香華  
幡蓋而供養之塗香末香亦用供養如是供

養已即見十方妙樂世界如是見者慎莫語人  
若言見者尚不得福況出生死還墮三塗經百  
千萬劫苦痛難處此人現身得白癩病又狂聾  
瘖瘖不知醜淡不別好醜欲求聰明反得愚  
癡報阿難白佛此行人者辭家出時當作何  
言佛告阿難此人出時應如是語我欲修行  
陀羅尼典父母聽不若言聽者我當出去如  
是語已心中默自念言我亦欲捨婦兒家屬  
修行陀羅尼典趣向道場應如比丘法修行  
淨行具於三衣楊枝澡水食器坐具行者如  
是應畜至於道場如比丘法又復亦應受於  
六重如優婆塞法捨惡律儀又受食時莫視



女色但自念言我心毒箭當去何拔用視色爲  
我從無始已來坐視女色墮於三途無有出  
期應作是念觀諸六塵亦應如是我諸弟子  
不應著此如是諸賊喪人善功阿難吾故語  
汝勅我弟子莫共六賊而作朋友唐喪其功  
阿難白佛言世尊向者所說謂爲放者若有父  
母妻子不放此人至於道場當服何藥趣向道  
場佛告阿難此人應父母前燒種種香長跪合掌  
應作是言我今欲至道場哀愍聽許亦應種  
種諫曉亦應隨宜說法亦應三請若不聽者  
此人應於舍宅默自思惟誦此經典阿難白  
佛當云何行佛告阿難此人行時當淨其舍

內燒香供養阿難白佛此人行處女人得到  
不佛告阿難到無所苦阿難白佛復得捉此  
衣不佛告阿難捉衣無苦但語我弟子勿著  
女色繫心莫放逸亦如道場人法若能如是  
作淨行者於七日中觀世音菩薩現其人前  
而爲說法若於夢中若寤寐時現其人前道  
場無異若如是者應一心憶念陀羅尼典若  
以散亂心者欲求人天得地獄報受苦萬端  
無有出期假使得出爲人奴婢人所憎害衣  
食不供常困飢渴無所不思令至心作若不  
至心後悔無及阿難白佛此人辭家出時刺  
除髮不佛言不也阿難白佛若不除者云何



語言具於三衣佛告阿難言三衣者一名單  
縫二名俗服阿難白佛言世尊向說一出家  
衣二在家服若在家者用三種為佛告阿難  
一出家衣者作三世諸佛法式一俗服者欲  
令我弟子趣道場時當著一服常隨逐身寸  
尺不離若離此衣即得障道罪第三衣者具

於俗服將至道場常用坐起其名如是汝當  
受持阿難白佛言若有善男子善女人若有  
不受六重戒者得趣道場不佛告阿難隨意  
堪任至於道場阿難白佛若有受者盡形受  
也佛告阿難亦如上法隨意堪任受諸戒律  
阿難白佛如向所說審為余不尔時七佛即

現其身住阿難前語阿難言莫以聲聞小乘  
小智意隨諸衆生起斷滅見過去諸佛都由  
此門成阿耨多羅三藐三菩提此法是一切  
諸法門三世諸佛都由此門成阿耨多羅三  
藐三菩提諸佛說已忽然不現阿難自念向  
有七佛今在何所佛知其意即時荅言今在  
東方阿難以汝起斷滅見故故來證汝阿難  
白佛審定能除而無疑也佛告阿難如汝所  
言必定無疑阿難白佛如是同行者有無見  
等有至心者乃能除此無量諸罪若不至心  
當名何人佛告阿難是人名爲少分得者阿  
難白佛此人命終當生何處佛告阿難隨意



所生阿難白佛隨意所生爲大方等陀羅尼  
力也爲三界尊力耶佛告阿難非是我力乃  
是摩訶袒持陀羅尼威神德力能致衆生到  
安樂國阿難白佛言若謂尔者我不堪任如  
是更問佛告阿難若我在世若去世後其有誹  
謗此陀羅尼者汝今諦聽善思念之吾當爲  
汝分別解說謗經因緣阿難一切十方世界  
破諸世界末爲微塵可知其數無有能知此  
人罪報若比丘比丘尼優婆塞優婆夷修行  
佛法者入我法中欲求種種人天果報欲求  
他方妙樂世界返得衆苦患所以者何坐謗  
方等陀羅尼故欲求種智返得愚報欲求人

天勝妙快樂返墮地獄究竟苦報欲求尊王  
返得下賤欲求聰明返得闇鈍欲得天眼返  
得盲報欲求子息返得獨報欲求身香潔返  
得大臭弊惡之身欲求端正三十二相返得  
三十二醜而自莊嚴欲求他方妙樂世界返  
得他方極苦地獄欲求大富返得貧報阿難  
以是因緣我故語汝莫謗此經我今略說如  
上罪報汝今諦聽當爲汝說更有罪報若有  
善男子善女人不解如來所說方便義於此  
法中橫生誹謗而以妄想分別諸法或重生  
瞋此人命終入於東方阿鼻地獄經歷受苦  
八万四千劫次第而受謗經罪報從地獄出



已復有八万四千萬子而以圍遶阿鼻大地  
獄亦時此人從地獄出入諸鬲子亦經八万  
四千劫一一鬲子復以十六鬲子而以圍遶  
亦復如是次第而入東南方南方西南方西  
方西北方北方東北方如是諸地獄一一而  
增劫數次第而受上至諸佛中至少分是人下  
至辟支佛聲聞人如是諸大士力所不救從  
此出已當生世間餓鬼畜生虫蟻蠅虱水虫  
科斗魚鼈之屬無一不遍假使為人亦癩癰  
疽貧窮抵突常生下賤眼目瞎瞎身體臭惡  
諸根不具人所惡見假使來生豪族之處語  
言吃症促命不壽人所呵叱說其形貌過狀

諸惡人所惡見常以呪詛令其早喪或時生  
世五根不具阿難此人先世皆由誹謗方等  
經故受業如是雖得人身諸根不完假使不  
遇善知識者如上所說次第還入是諸地獄  
如是地獄是其舍宅如是醜報是其衣服阿  
難當知是業不可以己情妄相而作令其指

神受諸古報阿難我故語汝無信人中莫說此經

大方等陀羅尼經卷第二

可

僑

巨僑反

瞎

上呼交反  
下呼夏反



